

四庫全書

集部

欽定四庫全書

集部

文氏五家集卷七

詳校官中書臣陸湘

侍讀臣孫球覆勘

總校官檢討臣何思鈞

校對官庶吉士臣滿庭筠

謄錄監生臣薛振基

欽定四庫全書

文氏五家集卷七

明文彭撰

博士詩集上

九日遊石湖次白二貞夫韻

重陽誰泛石湖船
秋水平吞萬里天
翠管銀笙空外沸
牙樯錦纜鏡中牽
西風著意吹烏帽
紅藥如花落舞筵
痛飲狂歌非慢世
江山佳節自年年

宴徐太傅園亭分得才字

高會追金谷諸公總上才
名山當戶列細雨拂簾迴
把酒巖花落彈棊水閣開
馬蹄歸獨緩知是習池來

碧峰寺分得襟字

地勝牽幽興僧閒澄道心
昔年曾寄跡今日復登臨
杉檜丹青古雲霞殿閣森
慚余羈旅客乘醉一披襟

和王二履吉湖上八絕

履吉讀書治平忽枉八絕
恍然興故山之想書云壽

承故山侶也或能嗣響乎因而和之

春到江南何處好石湖山水畫圖開
新蒲嫩柳一時綠
鷓鴣鷓鴣無數來

三月暮春湖水平拖藍潑綠映空明
青天倒映芙蓉障
畫鷁徐飛錦繡城

白鷺羣飛天倒開波搖山動水縈迴
峭帆美殺乘風舸
何啻張騫槎上來

茶磨楞伽疊翠屏汀州蘆筍立鳩鵲
白雲輕薄搖波淨

金瓶梅詞話
卷七
黃鳥丁寧喚酒醒

山壓晴湖水映山游人日暮不知還行春橋上好風景
綠樹紅花滿目斑

腸斷春湖新水流傾城兒女踏青遊郊臺不識吳王事
指點楞伽最上頭

一簇桃花紅欲然數株楊柳綠生烟柰可春光留不住
桃花零落絮漫天

山西緋桃太含胡竹裏班鳩逐隊呼形勝有餘心獨苦

王符開戶草潛夫

別徐允升次段子辛韻

君昔毗陵別余今白下歸帆飛大江月塵拂帝京衣心
逐冥鴻杳愁添落葉稀百年渾去住何必更依依

江中曉望

萬壑爭趨勢獨尊金焦東下海為門朝霞浴日霧欲滅
秋氣橫空天倒吞荆楚仲宣頻作客沅湘正則幾招魂
聖朝自媿獨貧賤滿目江山總淚痕

丹陽道中同嘉弟

昨夜乘潮發建康今朝潮落又丹陽
天南星斗隨沙鳥江上風烟憶故鄉
去住此身元不定飄零吾道孰行藏
同舟爾亦同淪落對酒無言淚兩行

送華從龍會試

萬里關河雪霰侵送君北上意何深
風雲已奮驂留道霄漢猶縣鴻鵠心
京國飛騰誰得似天涯流落獨難禁
曲江見說花如錦此日春風滿上林

陸原大書舫清游卷

不繫身如汗漫仙左圖右史米家船白鷗飛盡青天香
讀到南華秋水篇

立春日同彭孔加過袁與之桃花別墅

愛爾桃花塢臨溪新草堂烟籠寒篠翠風轉野梅香積
雪留殘白垂楊試淺黃山公行樂地時許野人狂

春日尋幽賞行行路轉迷忽驚高柳變似聽早鶯啼翠
桁依危峙紅橋度淺堤即看新水滿疑入武陵谿

新鶯

霏霏拂地柳千條
烟鎖紅欄十二橋
最愛新鶯初出谷
綠絲叢裏一聲嬌

雨中懷段戶部兄弟

久雨惟饒睡
高樓苦憶君
遥憐前夜月
只隔一溪雲
碧映船窓水
香焚綺幙芸
有懷吟不就
空自惜離羣

九日同王履約履吉過呂氏竹園

不作龍山會
同游呂氏園
流雲度秋水
修竹隱週垣
暮

局隨幽磴茱萸照酒樽
琵琶彈一曲一聽一消魂

華從龍邀遊石湖不赴次韻

不到石湖今幾時
故人有約竟愆期
非緣心亂辭蓮社
却羨山公醉習池

卧雲室

白雲罨層簷
空濛浩無極
一卧三十年
去來本無迹
仰睇見飛揚
會心自有得
欲往從之游
雲深不可測

贈徐子仁

金陵帝王居住氣鬱以蒼幽人無外慕迹含其章結
廬城之南謝喧聊尚羊鳥鳴青松下揮塵白門傍芳蘭
轉光風蕙帳霏芸香纖鱗時泳躍翠羽恣翱翔對此忘
利達日澹心彌良身逢明盛時雅志羞巖廊默坐草太
玄高卧同羲皇朗咏太冲篇遠慕淮南王至理已云得
壽考日以強逍遙塵寰中此樂殊未央

虎丘納涼

六月不堪城市暑避喧聊復虎丘行珠宮錯落涼颼轉

金磬玲瓏午氣清
阮籍竹林非傲世
幼輿丘壑自多情
莫嫌歸棹遲遲發
悟石軒前月已生

王繩武同游長干寺

寶剎長干外
登登紫蔓長
曲池縣玉澗
幽逕落天香
旭日搖金塔
纖雲擁畫廊
偶同王子敬
看竹到山房

金陵雜歌十絕

鍾山屹立羣山趨
虎踞龍蟠天下無
一代輿圖占厯服
萬年形勝屬皇都

臺城宮闕鬱相望金釭壁帶生輝光可憐侯景稱兵日
尚講空門滅性章

段岡三日紀吳功皇象奇書後代崇雨蝕苔侵荒草合
何人移置大成宮

沈約才華擅一時郊居作賦儉為師野人指點東田宅
猶說梁王受禪詞

遁跡鍾山事隱棲玄猿白鶴草堂低一朝出處違初志
千載移文憶稱圭

南朝諸寺石南門四百八十今誰存可憐惟有長干殿
金碧參差勢獨尊

陶公掛冠神武門華陽自築貞居室逃名那復論世事
笑殺尚平婚嫁畢

樂遊苑裏夜啼烏習家池邊春草枯何人得似山公醉
試問高陽舊酒徒

蔣山松柏鬱蒼蒼昭明讀書臺已荒
芟煩畧穢見刪述
金輝玉映垂琳琅

桓伊一日聲輝赫騎從聯翩將遠適青谿橋畔逢王郎
下馬停車三弄笛

人日竹堂看梅

今年春色早人日見梅花香入禪房靜影隨初月斜折
來烏几亂看去白雲賒東閣無由到詩成惠遠家

仲春履吉與之永之小集得草字

二月集嘉賓駘蕩春光早白日墮游絲黃鳥鳴聲好玄
言互剖析至理窮探討觥籌雜笑歡高懷自傾倒落霞

尚遲留初月出杲杲雖無陳遵投亦有魏公掃相期終
南山去拾金光草

賦得簡寂觀送盧師陳兵部

九江秀色結匡廬終靜誅茆此卜居苦竹只今遺往蹟
斗壇無復拜荒墟揮毫定接宣城筆梳羽咸看司馬車
王事有程留不得却將佳麗付圖書

聽鄰舟吹簫

風急船難進春寒酒易消他鄉頻作客何處忽吹簫近

水聲偏細凌虛興自豪可憐羸女思飄泊在江皋

舟中與顧貞叔夜話

燭短光猶白茶傾火尚紅論心聽夜雨把袂怯春風
浩江湖濶茫茫宇宙空蒨山明日上羨殺葛仙翁

雨中過紫陽橋

狂風驟雨濕征袍據蹇微吟興亦高只恐前身同鄭五
灞橋何似紫陽橋

道中望上宮

策蹇行行路轉深上宮臺殿鬱森森朱旛縹渺雲中影
玉磬玲瓏空外音丹竈有時窺白鶴砂牀何日試黃金
我來欲訪茆君跡古洞雲封不可尋

題折枝桃花

折得桃花拂袖香美人含笑立東牆無言亦自成蹊逕
解語爭教不斷腸

題芭蕉士女

雲鬢冰肌態橫生釵階瑤砌照人明午窓夢醒渾無事

間看芭蕉獨自行

予既和履吉八絕因思湖上四時之景有不減於
春者摘其可愛更賦六首

朝霞明滅起來遲爽氣氤氲獨立時紅日未昇湖水淨
五雲翻映碧琉璃

飛霞散綺日欲落須臾星斗生光芒鳴榔何處漁歌起
欸乃先聞餘韻長

月色湖光相盪射好風吹送水香來金鱗翠鬣漁人事

擊鼓澄波似可哀

五月山頭梅子肥
絲絲細雨隨風飛
衝泥蓑笠橋頭望
得意漁舟先自歸

久雨初晴花滿烟
水清沙白靜涵天
雙飛燕子歡相語
對浴鳬鷺喜並眠

飛雪堆山山失翠
動搖湖水白爭光
虛疑柳絮春風惡
却喜梅花吹暗香

舟中望靈岩

方舟下橫塘並駕趨玄墓出郭未十里而與靈岩遇江
山信有靈塵囂已殊路玄雲接琴臺朱藤綠狡兔吳王
昔全盛離宮矗無數宸遊無定居鑾輿此恒駐飛鳧臨
絕巘曲水蒼龍渡凝雲遏清響繁花映華輅廊餘響屨
名洞遶西施步一旦市朝變荒烟滿山樹繁華不須臾
倏忽譬朝露彼美五湖人終為脫塵霧

擬古

大明觀賜谷納照稱物情商飈起天末而有巨細聲造

化靡所私物我自不平至道無端倪六合隨虧盈一有
不足者中心勞逢迎卓哉仲尼徒千秋誰與京蒙莊與
李耳終令後世輕

彈琴虛窓下悠悠太古心吾意有所感孰審少原簪蚩
蚩市中兒知聲不知音鍾生伯子感荷蕢孔所欽此道
久寂寞千載和氏琛鼓希默然坐泪落沾羅襟

仰睇浮雲征俯觀江漢流浮雲飛不定川流去不休俯
仰既如此吾亦何所求人生在世間倏忽譬蜉蝣雖非

金石堅百年寧悠悠往者不可及來者猶可修

石頭城

鍾山開帝宅天塹控神州夾道朱樓擁摩空貝闕浮興
亡餘六代形勝屬三秋書劍十年夢蹉跎亦壯遊

雙林里

幽人樂大隱卜築雙林里翠樾落重陰清風散虛几誰
能受拘纏吾道任張弛考槃礪之阿予以忘青紫

侍顧華玉丈上方玩月

晨策入石湖落景愁上方上方連巘嶂疊障通河梁窈
窕入深谷崎嶇陟崇岡秋深氣蕭瑟雲薄天蒼涼萬木
振長風羣卉彫嚴霜遐觀諧夙心周覽窮八荒徑仄步
逶迤崖傾身低昂緣葛采石筆捫蘿拾蘭芳矯首睇飛
鴻俯視空茫茫皇皇殿閣森霏霏靄靄黃望望皓首白
耿耿銀河光坐久涼颼集泣露沾衣裳佳會合章縫友
朋亦孔良綠醕何淋漓各舉浮白觴目憐骯髒骨零落
同高陽邂逅山公醉容我禰衡狂山水能娛人為樂殊

未央夜靜心益閒天籟雜鳴蜚安得孫登徒長嘯和鸞
皇何如王子晉緱山吹笙簧懷哉鴟夷子功成謝岩廊
眷言仰前修千載永相望

懷石湖

不到石湖三十日猿驚鶴怨草堂陰竹林酒伴虛佳會
野寺鶯花廢短吟自是窮途多慟哭非關在坐少知音
平生性癖耽山水未脫樊籠違素心

訪雪次施侍御韻為袁邦正賦

雪發山陰興須烹掃雪茶玄談消世慮淑氣動春華玉
漏香沉燼青燈夜吐花孤吟成底事句穩足生涯

徽州吳君得妙法製墨賦詩贈之

新安松枝燒不絕紅霞碧焰相糾結收烟調搗三萬杵
練作玄霜烏玉玦設來几案對端侯雲浮烟散光澄澈
落紙三年不昏暗一點霜紈漆無別廷珪已矣潘谷死
此道只今誰得比水晶宮客汪廷器吳郎繼之真二美
時時贈我兩三丸光黑異常心獨喜日日用之無間斷

經歲方能半寸毀黃金可得柰墨無莫輕目前惟重耳
嗟余不欲磨世人願得一笑臨池水

訪顧子諫龍石山居

愛爾村居好幽栖興不窮晚烟凝樹白霜葉映山紅飯
煮香秔稻茶烹顧渚封明朝向城市不必念泥鴻

夜宴子諫書齋啟窓見月喜而再賦

徑僻無人到柴門夜不關清樽開綠醕白月掛青山室
靜心逾妙香銷意亦閒無論去與住且復破愁顏

送陸幼靈宰攸縣

卅角即相知老大傷離別離別未足惜所悲在歲月歲
月不我待種種已白髮憶昨少小時所志在功業悠悠
卒無成興言忽心熱送子雖云遠長沙亦宦輟親民惟
令尹吾道在用拙能寬一分益定有近者悅貧賤吾常
事衣食不苟缺富貴自有時榮華易消歇世人徒碌碌
吾言非漫說執手無他言相期堅晚節

新秋

樓居難避暑一雨掃煩蒸
暫喜干戈洗欣看黎庶寧
涼風期白苧爽氣薄青燈
筆硯雖堪近悲愁賦未能

湖上

開歲常懷湖上遊干戈阻絕未能酬
水光山色依然好紅葉青松無柰秋
驅冠曾聞當日喜漁歌猶有昔時愁
獨憐鷗鳥汀洲上來往翻飛得自由

鷗林八景詩為趙都諫賦

鳳皇山高插天青鳳皇山下雲冥冥
雲消雨歇總無迹

疊疊烟嵐虛翠屏

右鳳山雨雲

皚皚白雪擁龍峯萬壑千岩在畫中
賞得新醅開小閣
褰幃正對玉芙蓉

右龍峯霽雪

傍郭青帘入望高酒香春暖思陶陶
杖頭攜得青錢在
更拉隣翁過小橋

右南郭酒旗

車輪馬足擁飛塵來往闐闐實要津
莫問王陽迴九折
崆峒散髮是何人

右東岡使節

銀河飛下九天寒
濺玉飛珠映石欄
盡日迎風看不足

不須奇勝慕王官

右石澗水簾

望中燈火燦斑斕
獨有高人靜掩關
世事不須論感慨
都來只隔一溪間

右市橋燈火

春來雨足漲桐溪
片片飛花落岸低
自啟柴門閒倚杖
靜看新水浴鳬鷖

右桐溪春漲

荻花飛盡晚蒼蒼
月照陂塘秋露涼
碧霧漸消光漸滿
悠然一曲和滄浪

右柳塘秋月

胡總制受王直降有詩志喜因次其韻

出師本意戮鯢鯨擬掃妖氛繼頌聲
心服已看頻稽首
威加咸各荷餘生便宜總得中權重
處置深知妙算成
不用拊髀思衛霍海濱原自有長城

初夏遊烟雨樓

郭外空濛烟雨樓飛甍岌嶭峙中流
三江形勝風濤轉
萬井鶯花雉堞浮此日雲中見鄉國
何時天際有歸舟
停杯莫惜斜陽下新月纖纖暎遠洲

遊鴛鴦湖示項君

秀水亭前水荇香
鴛鴦湖上浴鴛鴦
遠天簫鼓迎歌扇
倒影樓臺浸女牆
華梁夷猶衝菡萏
竹枝歛乃和滄浪
莫言煩暑無由避
月照波光玉露涼

獅子林

古石棱棱古寺西
奇形怪狀類狻猊
虛疑苔館深深見
實有雲生冉冉低
白石燈明禪課了
青蓮花放梵音齊
只愁三宿還生戀
惠遠何妨一指迷

樾徑

入門百本循牆樹六月曾教落翠陰乍到只疑天竺國
坐來元是比丘林森森古殿丹青剝細細苔花錦繡侵
讀罷楞嚴時縱步間關何處語幽禽

古柏

吳中昔有梁朝檜范相祠堂獅子林喬木只應占世澤
禪關時許坐鳴琴長廊野鶴巢香葉古殿丹青鎖翠陰
深夜蛟龍時一吼獨驚諸葛少陵心

晚步東禪寺

落日敲門到蘭若白雲深鎖青蓮宮
循牆老檜凌寒綠滿砌小草含霜紅
香供寥寥晤大地梵音杳杳迷三空
玄言一刻已陳迹何日叅得禪關通

憑虛閣

憑虛閣上幾迴來秋氣蕭森此日開
金殿虛無通碧落青山相對即蓬萊
蒼茫宇宙悲長劍荏苒風塵付酒杯
獻賦十年猶未遂愁從西北望三台

懷張子言時寓揚州

君逃世網住揚州我累樊籠滯去留咫尺故人不相見
飄零江海渺余愁燕南冀北總新句越水吳山非昔遊
看劍引杯心尚壯不勞重念敝貂裘

拂水崖分得寒字

虞山西南太奇絕流泉迸出青崖湍橫分一道地脉裂
倒飛十大天風寒注披射日金光草淨瀉孤雲白玉盤
洪厓華蓋眇何許此時直欲招青鸞

宿石門山

秋老山開錦繡紋石門清氣獨氤氲水深隱隱潛龍穴
巖峻時時過鹿羣芋栗未收看野燒松篁不整度秋雲
地虛疑有仙人宅笙鶴嘈嘈靜夜聞

雪晴堯峰瞻眺

臘日暉暉春欲動山行逸興此時須深秋磴道餘冰雪
且折梅花對酒壺萬里寒雲凝不散一行饑鴈疾相呼
具區只在諸山外指點堯峯入畫圖

白白梅花半吐馨嶺頭風急酒初醒朱萸叅錯虛無見

石磴崦岬次第經天際舟航來片片水中岩壑望冥冥
洞庭春到猶殘雪相對東西雙玉屏

人日望亭舟中

人日常年野寺遊今年人日滯孤舟誰憐杜陵寄佳句
却憶故鄉添客愁忍見風雨忽慙淡不禁楊柳太輕柔
浮名底事牽行樂極目清波雙白鷗

鳳凰臺

玉壘綠江南北分鳳凰臺高高入雲元嘉紀瑞空陳迹

李白題詩真絕羣
黃屋靜移鳩鵲影
彩霞猶見羽衣文
不須灑淚新亭上
慷慨狂歌日又曛

黃山

江激寒濤殷曉雷
黃山門下海潮迴
清秋白晝蛟龍舞
翠壁丹崖錦繡開
縹緲樓臺依日月
虛無雲氣接蓬萊
天風何處飛黃鶴
笑指王喬歸去來

聽濤

金沙湖上水浮天
夜夜寒潮到枕邊
春水扁舟思范蠡

秋槎八月候張騫風生蘆荻聲逾壯月照蒹葭興渺然
小築茆齋真勝絕分明杜甫浣花川

春雨

春雨陰陰十日餘苔封曲徑掩精廬泥深門外無車馬
自向山齋理舊書

四月

我愛江南小滿天鰣魚初上帶冰鮮一聲戴勝蠶眠後
插遍新秧綠滿田

楚江秋泛為吳子賦

有客欲登黃鶴樓掛帆十月辭揚州瀟湘月落洞庭晚
巫峽猿啼雲夢秋攬勝定尋赤壁壘浩歌常傍白蘋洲
杜陵李白風流在送爾扁舟汗漫遊

春寒

臘盡期春至春來寒更隆凝雲初漏日舞雪又旋空
慄慄陰生潤重重箔護風梅花消息近應只在牆東

柱山

滄海浩無極空濛混太清
寒潮初拍岸涼月已生明
烟霧虛塵界星河動玉京
三山真可接知有列仙行

觀舞追次白樂天韻

張燈留客舞茵開花鼓闐闐
次第催拂袖即看嬌影亂
鳴環真見細腰來節遲顧鶴
餘流盼唱遠驚鴻思自迴
頓履一聲隨樂止令人思築
避風臺

廣陵客懷

落日停橈古渡頭繁華人說是揚州
荒祠不見無雙樹

錦纜空傳十丈舟
細雨入窓燈黯黯
輕塵撲面思悠悠
功名何事翻成累
轉憶當年馬少游

登君山

君山北面大江開
浪觸濤崩天地迴
雲外孤帆時隱見
望中雙島獨崔巍
空濛烟霧樽前起
瀕洞風塵海上來
身世只從愁裏過
出羣誰見濟川才

江上有懷陳道復

誅茆築室傍江隈
地濶河平浦溱迴
返照趁晴收晚稻

深秋過雨長新苔並眠鷓鴣雙雙見對浴鳬鷺日日來
苦憶故人城市隔一杯濁酒為誰開

送張十二子饒之京

寡合吾真嬾相知誰最深那堪鴻鵠志各有稻粱心野
岸花爭發長河柳帶陰別離未足惜願爾早為霖

竹谷

蔣翊開三益嵇康稱七賢風來聲戛玉月上影含烟最
喜臨丹壑偏憐映碧泉會心時解帶消盡世塵緣

九日懷吳山

九月九日人共愛吳郡吳山吾獨憐湖波盈空天上下
巒容過雨雲澄鮮捫蘿攀葛遊人路擊鼓吹笙何處船
簪萸落帽誰復繼空餘嘉話令人傳

夢中作

羅襦初著照人明不語階前獨自行鸚鵡籠中渾識得
忽然徐喚兩三聲

行春橋

湖上新波沒遠洲行春橋下繫孤舟
林間黃鳥聲相應竹裏班鳩啼不休
已愛山光和雨潤即看柳色帶烟柔
韶華不為春陰閣先折梅花次第遊

拜郊臺

越城橋邊拜郊臺越城橋外越兵來
越兵一去無消息臺邊野花空自開
澄湖水滿放畫舸白日山深生綠苔
浮雲不見鴟夷子極目扁舟心轉哀

詠白燕追次袁海叟韻

驚見玄禽故態非雪翎玉首世應稀越裳雉尾姬周化
瀚海烏頭漢使歸誤入梨花惟聽語輕沾柳絮似添衣
珠簾不隔涼州路任爾差池上下飛

古藤

古藤偃蹇卧空村歲月侵尋蝕蘚痕詰屈纏綿隨起伏
蜿蜒下上欲崩奔渴虬飲澗驚還感玉螭穿雲舞未蟠
賴是支離辭世用天真自葆老丘園

次韻董子元亂後見懷

風日蕭條獨倚闌，高歌強笑不成歡。
頻年兵燹何時已，此日烽烟詎忍看。
千里故人勞問訊，一時黎庶惜凋殘。
蹉跎歲月驚新夢，悵望雲間思渺漫。

玉蘭花次韻

玉花千隊映華筵，勝賞須知異隔年。
香透窻紗凝郁烈，影搖庭月鬪嬋娟。
歌停莫使空金斝，賦就憑誰擘絳箋。
若向揚州比瓊樹，未應聲價讓渠專。

劉給諫約遊西山不果

燕山西面擁皇都曲曲樓臺罨畫圖
瑤草琪花紛玉澗
璇題金闕映珊瑚烟霞自昔稱靈境
風物如聞在給孤
咫尺紅塵不能到夢遊何日訪蓬壺

宴董學士新堂

席上以碧桃花為供

學士新堂切禁垣賞筵秩秩詠斯干
碧桃和露來天上
玉醴生香出太官
幕局往來隨勝負
投壺還激磬交歡
獨憐滄海將歸客
後會難期強自寬

初夏書懷

初夏新晴事事宜定鑪香熱海南奇閒臨淳化義之帖
細讀開元杜甫詩石鼎臙臙閒鬪茗松枰剝啄試圍棋
新篁脫粉芭蕉綠不怕星星兩鬢絲

清秋氣朗庭無來賓蕭然高卧喜而有作

破屋蕭蕭一事無閒窓睡起客來疎空庭日轉清陰寂
脩竹風輕翠影虛筆硯精良開几案雲天縹渺淨階除
此生誰謂儒冠誤養得閒身讀道書

洞庭山岱心灣

太湖波浪拍天浮，曾向東山爛漫遊。
響水澗邊新濯足，莫釐峯上試舒眸。
金庭玉柱開三界，碧水丹山儼十洲。
輸與幽人能擇勝，岱心灣上築高樓。

春來久雨初晴過，周公瑕、几齋醉後書壁。

一春已過八十日，三月惟餘此日晴。
桃花李花總零落，黃鳥白鳥羣飛鳴。
湘簾掩映竹色淨，渠几拂拭雲花生。
莫道韶華去都盡，暫時晤賞愜幽情。

陸子虛園賞舞青霓牡丹

穀雨園林萬綠齊
名花驚見舞青霓
朝霞麗日腥紅暎
返照迎風翠暈低
繡幕參差香露滴
雕闌高下錦雲迷
沉香亭上應如此
却笑清平漫品題

秋日寶塔寺言二尹小集

秋日幽尋物外期
行行出郭得招提
官閒自覺紅塵遠
地勝何妨白日遲
雲散空花堪結社
涼生別院試圍碁
皇都車馬紛馳逐
只隔城闌已不知

送許太僕元復之任滁州

行人欲發柳依依南望滁陽送落暉地勝久知林壑秀
官閒更喜簿書稀慚余濩落人間少羨爾褰裳願不違
執手欲言言不盡夢魂常繞秣陵飛

詠門神

煥然茶壘已更新覩爾儀容定有神幸得貨財無悖入
偏於風月自相親洞開喜有朝來客靜掩何妨夜扣人
待得功成身已退朱門白屋一般春

送袁永之會試

冀北多良馬最異是龍脊天子愛神俊應圖徧求索天
閑雲錦羣汗血毛盡赤袁子千里姿早已奮伏櫪丈夫
志萬里功名酬宿昔世人愛年少而子今白晢十四縛
儒冠十五期射策嘉靖四載秋俄然魁選格鄰里擁道
周嗟賞聲嘖嘖顧我蓬蒿人遂爾雲泥隔非無扶搖心
羞刷冥鴻翮交期漸潦倒側身長充斥默坐驚神魂傾
想潛動魄忽枉瑤華音告我將遠適僕夫已盈門驪駒
就行役杯酒陳祖道風帆催畫鷁望望黃金臺冠蓋手

可負子今別我去瞻依天咫尺一朝登明堂指顧聲輝
赫視草明光宮通名金閨籍致身青雲上那復戀故宅
想君束髮時會合在朝夕三入金陵城歡好同作客出
入共追隨疑義互剖析聚首十五年分睽心戚戚送子
雖容易思子轉愁劇落日生秋風泣露沾衣掖回首望
平川迢迢阻阡陌梧桐墜葉黃皓月當空白酒酣發大
叫浩歌氣填臆歸期何渺漫別意多感激莫惜雙鯉魚
寄我慰岑寂矯首睇飛雲殊覺天地窄出門大江橫燕

山馬頭碧

題畫蘭

光風薄叢蘭奕葉有餘香莫以一枝少九畹亦同芳

人日祝京兆徐子九王履吉集停雲館得題字

今年人日春意動梅花滿枝春草齊一聲倉庚送殘雪
萬里新生水湖堤粗糲強將佳客供綈縹還許故人題
難酬令節惟拚醉任性全身學馬蹄

泊儀真

金史月令
卷七
落日不可渡孤雲天際浮乘潮辭白下卷幔入真州水
氣生江霧星光肅斗牛此身何所似天地一虛舟

題袁尚之合歡秋葵

兩兩金英秋露消雙雙翠蒂釵階嬌分明合德同飛燕
並沐新恩出遠條

食霞樓為周羽士賦

高樓遙見赤城標笙鶴時來王子喬服食親傳金簡秘
洪厓華蓋幾尋招

霏烟五綵傍樓明
吸盡瑤華禮太清
夜靜時聞環珮響
天風吹落步虛聲

同王繩武彭孔加王子卿袁氏四弟兄及嘉臺二弟登上方

一春常畏雨勝賞及時須
昨對雲岩月今開寶積壺
飛花隨急蓋落日動明湖
未得食霞法王喬何處呼

宴外舅有斐堂

丈人華屋好綺席
幾迴歡嘉樹雕闌倚銀筍
玉指寒清

狂元自愛禮數本來寬客散堂虛靜開簾待月看

虎丘酌茶送王子美遊揚州

春風含冷動梅花陸羽泉亭試煮茶明日扁舟楊子渡
虎丘回首碧雲賒

吳王龍艦憶曾過隋帝行宮蔓草多君到揚州煩問訊
錦帆風景近如何

九月八日登天平

翠壁丹崖劇可憐昔年曾酌白雲泉重尋鳥道緣垂葛

醉倚龍門嘯遠天景物傷心秋色外樵歌滿耳落霞前
一杯強為諸山進明日重陽無酒錢

席上贈祥上人

天平猶未到已見石嶙峋落日照梵宇秋風吹葛巾賓
朋多曠達雲物任鮮新麗藻逢支遁吾儕媿許詢

送王祿之會試得姑字

我聞蓬萊之山乃在碧海之東隅雲霞五色成虛無玲
瓏窓隙翠羽鋪中有玉臺金樹紛縈敷曲房阿室木鷄

珊瑚青苔紫芝石髓菖蒲仙人來止多歡娛逍遙慮紆
何蘧蘧又聞金華東觀乃在西北之上京台階清切稱
天衢彤樓紺殿黃金扉玉墀丹陛羣公趨王郎真是天
上手持一顆明光珠秋風別我獻天子自謂駿馬今
應圖看君意氣橫秋空扶搖九萬誰能拘瞻依日月光
沐浴皇恩殊此時不羨王子喬乘雲跨鶴飛雙鳬王郎
王郎真丈夫功名唾手如轉轡始聞奮翮自白下復道
朝天入帝都帝都遙遙三千里惜別誰忍歌驪駒殷勤

把袂重致詞且為王郎立斯須相看已有雲泥隔此身
那得同馳驅君今已立白玉堂如入員嶠登方壺我今
栖遲原憲貧亦是食精鍊液之仙姝撫心茫茫淚如霰
望君去去不可呼望君去去不可呼願解腰間金僕姑
走筆送張主簿致仕還燕

秋老江南木葉凋征人欲發恨迢迢不須更說陶彭澤
五斗從來懶折腰

沈工部桃花書屋

君住桃花塢何如鄭子真應同潘岳縣非是武陵民香
散餘書帙花飛襯舞茵十分春色好劉阮問迷津

石子岡望江

長江望不極劃然射雙眸風帆迅飛鳥却逐東逝流落
霞照寒影爽氣生清秋羈懷三十日何如此日遊

茅山

盤迴繞山足望望山之椒丹崖出殿角落日風蕭蕭時
聞金磬聲還向空中飄聞寂無來踪慮澹滋彌消閒庭

候月出長松生夜濤

送袁補之會試兼簡永之

彙進誰憐貢禹心
交期潦倒仲宣襟
長河風雪催行役
上苑鶯花幾盞簪
海內弟兄三歲別
天涯功業二毛侵
張儀自信猶存舌
慷慨時歌梁父吟

金陵遇雪

霏霏朔雪滿郊衢
此日樓臺氣象殊
雙闕參差浮白玉
九門深寂約金鋪
斜飄殿角罍罍暗
漸積宮牆閣道迂

惟有秦淮萬楊柳獨將春色報皇都

江

不見長江險寧知天地浮金焦當萬壑日月盪中流波
浪潛鮫室雲霞結蜃樓乘槎吾有興直欲犯牽牛

金陵

此日帝城游風烟入望愁青山暎黃屋綠水浸紅樓高
樹宮牆繞新波太液流雨花臺上望無處不宜秋

題老子

出關新述五千言
朗目疎髯氣浩然
周日曾為柱下史
畫圖今復見神仙

湖上懷王二履吉

湖上晴光劇可憐
水清沙白淨娟娟
瑤杯停手風生渚
翠管迎船月在天
靜裏懷人黃鳥渡
醉中開卷白雲篇
落霞一片漁歌起
却憶鴟夷思惘然

余有別業在笠澤之上
嘗課耕於此
因閱黃太史
漁父詞喜而繼作聊以述其自得之樂也

槲葉新畱舫艤船衝風逐浪去如烟無姓字少牽纏儂
住吳淞不記年

春暖融融雪乍消江頭潑潑長春潮風漸起浪初高網
得江鮮破寂寥

無利無名一老翁筆牀茶竈任西東陸魯望米南宮除
却先生便是儂

山遠江深無四鄰烟波惟有一漁綸鳬鴈侶鷺鷥親自
是人間快活人

吳淞江上是儂家每到秋來愛荻花眠未足日初斜妻
喚船頭看落霞

釣得鱸魚不賣錢船頭吹火趁新鮮樽有酒月將圓落
得今宵一醉眠

八月斑魚逐曉風家家方出釣魚砦鰕作餌竹為弓睡
起朝來日影紅

夜深結網一燈紅吹笛鄰舟攪睡濃雪夜月雨晴風都
是漁家一醉中

臘月捱冰上白魚衝風冒雪欲何如
膚欲裂手仍拘免
得求人樂有餘

人日訪沈氏兄弟

新年多雨雪人日尚陰氛
世事已如此勞生何足云
草堂誰寄語故友惜離羣
他日相思處吳淞江上雲

穀日迎春見雪

雪霰集崇朝紛紛墜復飄
春從明日至臘向此時消不
恨遲梅蕊行將變柳條
豐年應足兆隨意老漁樵

春日東郊訪盧文厚

春日東郊外風光事事新
杏梢紅欲破柳色綠初勻
野水侵溪岸輕風起陌塵
數椽茅屋底愛爾獨安貧

伯起入山有懷

草草還山去應嫌城市喧
避人修靜業散帙愛空門
嵐翠迎窓潤鶯聲入耳繁
石湖春色好羨爾獨傾尊

題孫氏清蔭閣次孔加韻

孫侯賜第吳邑東
華堂虛敞生清風
朱欄繡幙看不足

別開小閣居其中一逕逶迤曲曲通窓前一樹青梧桐
覽輝威鳳下高幹窺人紫燕穿簾櫳清樽坐上客常滿
主人霏雪呈雕龍豈無勲業繩祖武自愛大雅多春容
豈無韜略同儔輩所志不在敵與戎平生已有清秘癖
昂藏獨立羞雷同眼前萬事不如意欲移王屋追愚公
世人嗤君迂且庸胡為不為橫與縱君言世人知而通
胡為碌碌徒書空橫琴在膝月在牖何必執戟隨揚雄
相如逸才命運窮著書不得從東封焚香獨坐對髥几

聊當燕然勒石功

題畫馬

閒來快讀馬蹄章
任性全身樂正長
內殿豈無尋丈地
令人伏檻憶孫陽

王希堯自瓜州過訪

忽爾辭京口
翩然訪敝廬
寒雲殘臘盡
落月夜窓虛
世事惟看鏡
生涯好著書
扁舟揚子渡
悵望獨愁余

春城間眺

欽定四庫全書

閨闔城頭春草長綠楊早已滿橫塘桃如解語垂垂發
燕亦多情故故忙雲白天青山疊翠日高風煖水生香
無端盡日溪邊坐典却春衣醉夕陽

壽郡伯胡公乃翁八袞

君不見西華之山凌碧虛鍾靈毓秀神仙居盤礴日月
枕扶輿廣平方成委丹廬黃苓紫芝無處無青鳥白鶴
時相呼金燈交錯如珊瑚懸崖窈窕通蓬壺我聞維嶽
降甫中山靈集聚多奇珍異人往往乘時出飄飄不縛

寰中塵道高德邵常軾軻媿殺腐鼠羞鷄雛豈無勲業
動當世不勞政事耽文儒歸來自理山中屋整頓松筠
友麋鹿有時長嘯學蘇門一似陶潛愛薤薤三十年餘
變鬢髮閉門不問黃金闕讀書養性還灌園山中四時
知歲月閬風玄圃不可居閒來學得冷霞法洞中僊侶
時相逢八十優游樂無窮上友安期浮丘公下揖子晉
葛仙翁瑤裾玉舄氣瀟灑手揮如意談玄空百年去去
即常生服食不須毛骨輕南極耿耿垂明星西望佳氣

雍州城綵衣迢迢阻江麓養志至今食君祿高堂不得
試兒啼霞觴遙進杯中醪吳門有士卧空谷為君高歌
鶴南曲

題蹴鞠圖

莫問三郎沉醉無毬場握手笑相呼繁華消歇須臾事
傳得當年蹴鞠圖

秦淮閒泛

秦淮秋淨水生紋看見鍾山起白雲但得畫船常載酒

不妨疊鼓散鷗羣

雨華臺

石頭城裏幾迴遊
萬里孤鴻下遠洲
落日雨華臺上望
山青雲白正宜秋

走筆和張伯起郊園感懷

澤國風光何處好
伍胥祠下百花洲
相看只隔盈盈水
悵望還生渺渺愁
正是湖山凝遠眺
可堪雲日麗清秋
何當獨買扁舟去
茶磨山前爛漫游

海棠山鵲

萬里春光蕩冶情
海棠晴晝太憨生
捲簾不覺游絲墮
忽聽一聲山鳥鳴

滄浪亭

昔日蘇公遊行地
于今清勝屬高僧
虛亭獨坐渾無事
惟有楞嚴一卷經

對月有懷胡季孚呈孔加伯起

放棹辭城市
虛堂早見招
停杯新雨歇
對月故人遙
愁

裏眉頻蹙風前首重搔
翻思前夜別魂向一時消

空侯

春風衆樂奏空侯
怨抑多爲君彈一曲
公今無渡河

上巳石湖袂袂

風光日漸遲
川原淑景移
逢茲少長集
攬此湖山奇
上侍白髮親
正乃芳春時
袂事聊爾修
觴詠隨所之心曠
神亦怡
豈惜滯還期
楞伽同曲水
三日恣游嬉

新正六日山行見梅花

開歲陰陰今日晴梅花的的照人明
入山早已饒春色
對景寧忘感物情
海外烽烟無上策
天涯勲業媿浮名
明朝人日尤難遣
貫得新醅且自傾

二月三日大雪因憶往歲石湖看雪亦是日也倭
寇未寧城中戒嚴不得出遊有懷却寄季孚

憶昔楞伽看雪時
梅花萬樹玉參差
頻年蹤跡空魂夢
此日湖山阻亂離
俛仰歲時如信宿
蹉跎事業媿相知
春風爛漫原無限
只恐時清未及期

玉陽仙選壽史恭甫

玉陽之山雲英英玉女祠前春水泫仙人騎鹿過東海
相邀服食修長生嘈嘈笙鶴來雲輶蔡經初見王方平
有時月底聞歌聲分明馭氣遊蓬瀛人生此樂真自得
百年去去隨虛盈富貴囂然直可輕有才不用空浮名
即今甲子已一週巖壑放浪無逢迎君扳玉樹肯相待
我欲從君禮太清

次韻荅李太史

曾試山中茗無如雨後泉浮花凝白乳然竹散青烟禪
榻論文細虛堂晤語玄何當謝塵鞅來結碧山緣

雨後山行次華學士子潛韻

夙有登臨癖新涼豁素襟羣公皆建業高會擬山陰覽
物知時改談玄悟道深水流看不息隨處洗塵心

夢中題朱竹

淇園一雨洗塵埃忽變朱顏破綠苔春夜珊瑚映燈火

丹山赤鳳下瑤臺

題南橋范子潤園亭

仲夏園林好薄陰
碧樹重孤花猶灼灼
一鳥鳴嚶嚶幽
逕抽新竹清風奏古松
新茶煮初熟有客忽過從

二月一日大雪同孔加魯仲公瑕嘉弟遊虎丘

曲逕深埋短簿祠
行行如失白蓮池
高臺層疊銀成砌
古木橫斜玉壓枝
弭害已占盈尺瑞
陽春難和郢中詩
梅花不是違時候
只待東風次第吹

暮春遊虎丘

悟石軒前草似茵
劍池水滿碧粼粼
浮圖麗日諸天迥
新綠敷陰萬樹勻
不到一年如隔世
尚餘三日是殘春
艱難莫問烽烟事
濁酒隨時且慰人

虎丘別諸親友

風日虎丘好
諸親送我時
殷勤一杯酒
已作隔年期
身為浮名累
心猶故國思
他鄉見花柳
折得寄憑誰

蓮花寺看桃花

貧賤出門難
那知花事闌
已愁連日雨
更怯一春寒
野

寺雖牢落天桃猶未殘偶然乘興過隨喜一回看

四飛山莊示肇兒

創業誠非易躬耕也自便儉勤知有益辛苦自無愆已
喜通阡陌還宜近簡編會深耕讀理應自有豐年

訪唐應德荆川別業

久負論文約相違頻夢君碧山開別墅白社鎖閒雲會
晤偏難值懷思空未聞王猷興盡返鼓楫動鷗羣

期遊平山堂不果

春盡揚州水拍堤堤邊楊柳綠絲絲高懷擬向平山盡
勝日難將樂事期山色有無空秀句心情感慨惜多歧
明朝又逐紅塵去回首烟霞繫我思

和楊弘之大叅遊金山見懷

金山三月暮春遊麗日澄江銷客愁自愛迴瀾臨砥柱
非關望海上高丘叅差臺殿中天起浩蕩乾坤日夜浮
勝賞已知君獨擅郢中佳句自難酬

早發揚州至邵伯湖

早發揚州路行行邵伯湖輕舟隨社鳥落日下平蕪泊
沒漁舟杳蕭條旅思孤憑將一樽酒隨意宿前途

漂母祠

漂絮淮濱知幾人當時誰復念王孫莫言此日千金報
自是難忘一飯恩

泊舟八里灣

久旱苦無水泊舟八里灣風生沙撲面霞起日沉山深
夜聞愁語侵晨候啟關從來知世路羨殺白鷗閒

師家閘

水涇舟膠春晝明振衣隨步得閒行萬株楊柳綠堤古
一帶清泉觸石鳴無數青山圍秀色有時黃鳥度新聲
不堪沛北風塵路翻動江南行樂情

連日無水日行五六里十二日自魯橋至石佛一
日過五閘喜而有作

日日問前途還應有水無傳言半疑信欲進且躊躇忽
爾河流駛全消旅思孤一朝行五閘世事若為虞

南旺

輕風獵獵薄新蒲，喜得關河春未徂。
白鳥衝波隨舴艋，綠楊隔岸喚醍醐。
千金汶上空遺跡，一片江南錯自呼。
辛苦驅馳緣底事，令人對酒媿漁夫。

將至京作

神京縹渺接三台，驛路春光景物催。
魚躍驚濤迎浪轉，燕巢高岸逐風迴。
射時商賈爭先後，候閘舟航滯去來。
一自隗生身顯後，有誰把酒酹荒臺。

潞河道中聞東倭猖獗

滄州去去是天津又逐鷄聲潞水濱
世路艱難青眼盡浮名奔走白頭新
柳枝標淺依依近燕子迎船故故親
漸近神京方自慰不堪鄉國有風塵

舟中見白燕

擊鼓開船溯上流行行日已近皇州
點波白燕驚人眼出樹青帘動客愁
千里音書空入夢中宵月色又當頭
久拚世事蠅蝸外他日終師馬少游

見月

去去通州道紅塵撲馬鞍行將趨象魏夢已入邯鄲未
問隗生里先彈貢禹冠舉頭明月在不覺是長安

初至京

旅食到京華春深何處花感時空老大獨坐每興嗟素
乏資身策新添罩眼紗出門三閱月無日不思家



文氏五家集卷七

欽定四庫全書

集部

文氏五家集卷八

九

詳校官中書臣陸湘

侍讀臣孫球覆勘

總校官檢討臣何思鈞

校對官庶吉士臣潘庭筠

謄錄監生臣薛振基

欽定四庫全書

文氏五家集卷八

明文彭撰

博士詩集下

廷試述懷

少小習章句朝夕親筆研詞場十度游終迷五色線行
行預計偕迢迢入畿甸皇畿本佳麗瑞靄鬱蔥蒨五城
十二樓紫陌韶華徧披褐朝至尊複道隨羣彥步趨白

玉堦日射黃金殿
螭頭繞爐煙
雉尾開宮扇
操筆陳蕪詞
來上宸旒獻
雖非仲舒策
不待常何薦
但願納芻蕘
自忘草芥賤

徐李二相公枉駕見過失迓以詩謝之

曲巷幽居暫借棲
漫勞方駕駐柴扉
驚留折簡題凡鳥
敢謂虛名動少微
忘勢一心期牧仲
好賢同志詠緇衣
歸來獨倚衡門望
彷彿猶疑見羽旂

嚴相公招飲西城寓直

直廬清切傍西垣退食委蛇赤舄安迂性自慚疎禮法
中廚先已出盤食虛勞吐哺延東閣實媿侏儒飽大官
既醉歸來心獨醒猶思彈鋏學馮驩

邢太史夜坐以雜花插瓶作供

雜花初上映燈光露濕羅襟夜氣涼笑殺風流貧學士
瓶花亂插當紅妝

銀箭頻將玉漏催花枝月色共徘徊
蕊宮仙子初回駕
無數清香入酒杯

邢太史田錦衣集神樂觀

琳官秋淨擁樓臺仙侶同游院院開白晝漫憑棋局遣
清風時送酒杯來高槐承日敷清蔭老柏食霜蝕紫苔
回首又隨車馬足始知靈境少塵埃

送朱子价

辭家是三月楊柳正依依忽爾歲云暮燕山朔雪飛已
驚物候改况復故人歸獨坐不成寐時時歌式微

再承李閣老見過

相國高山斗如若為優禮及庸疎衡門更辱高軒過
陋巷頻看長者車樞下長鳴悲志業河東有賦待吹噓
江湖潦倒空雙鬢一任風雲自卷舒

送周子籲入蜀

偶干微祿到長安忽漫相逢暫解鞍萬里驅馳吾道在
三年離別酒杯乾趨朝始脫滇南路遠宦寧辭蜀道難
使節重迎餘澤潤錦江春色幾迴看

登報國寺佛閣

送客出都門闐闐車馬喧言尋靜者室因得給孤園暫
與塵囂遠閒將貝葉翻偶從高閣望寒色滿平原

次韻馬內翰

燕山朔雪未全消銀燭淋漓吐絳綃壯志未酬顏駟老
華筵喜預孟公招厭厭不醉歸何夜小小歌聲聽轉嬌
一刻鄉心雙鬢改幾回搔首望層霄

至日雪晴謁徐相公蒙以內賜珍珠紅酒留酌賦
此謝之

金鑾退食綺筵張積雪真成白玉堂陽至雲霞占有象
清時鐘鼓樂無疆珍珠酒賜天恩重綵縷絲添日影長
吐握未能歌盛德草茆何幸被餘光

除夕答顧汝所

今夕是除夕他鄉憶故鄉懷親千里近清話一杯長老
去心猶壯更深燭有光平生多感慨相對自難忘

元旦朝賀

淑氣迴春滿帝城元辰獻歲泰階平蓬萊宮闕千門曉

閶闔雲霞五色成
大地河山開景運
中天日月麗文明
一人獨坐逢佳節
擊壤康衢繼頌聲

人日雪晴答徐相公

人日雪初晴
朝曦映雪明
已占吾道泰
更喜物華清
霽景融金殿
陽和布玉京
共知調變在
四海荷昇平

雪晴同呂舍人顧汝所南郊閒步

京華春色好
最好雪晴時
樹凍初含潤
溝冰欲動澌
風生塵冉冉
日下景遲遲
攜手南郊去
仙家有酒卮

清明大雪

清明何事雪漫漫始識燕山春更寒
遂使鶻鶻鳴較晚只疑鴝鵒尚留殘
風回柳絮綏綏下簾綴珠璣細細看
學得風流陶學士呼童旋掃試龍團

是日約往南郊不果

南國清明花事稀燕山雨雪尚霏霏
長安九陌春何處旅食經年客未歸
兩地風光關念切平生事業寸心違
也知空負城南約不是袁安不啟扉

次彭孔加見懷韻

遠書初至日正是憶君時况復經年別何堪兩地思石
湖乘雪興南郭看花期頻有還家夢知君知不知

次張伯起見懷韻

別君銷盡黯然魂老我終慚樾下轅三禮未陳猶有恨
一杯獨酌更何言春風已動江南柳歸棹行辭薊北門
莫向京華問消息到家應共洗清樽

次張幼于見懷韻

黃金臺下草霏霏
日日臺前送落暉
覽勝有時趨禁苑
夢歸長夜到親闈
故鄉風景心常在
帝里春光雪又飛
看鏡倚樓天萬里
浩歌時一詠緇衣

上巳不出

袂襖當年在石湖
綠油畫舫映青蒲
逸情遠興形骸外
水曲山隈少長俱
竹裏桃花山鳥喚
水邊楊柳麗人扶
皇州春色來何晚
獨坐空齋一事無

出京承徐相公贈詩次韻酬謝

五雲樓閣九重城，瞻望何殊萬里程。
調化共知歌盛德，好賢端不為修名。
平生雅度真難值，此日新詩更有情。
潦倒窮途甘棄擲，獨慚虛譽動公卿。

夢還家示聲兒

離京纔二日，已有夢還家。
親戚多情話，風塵感歲華。
共憐鬚鬢改，不覺道途賒。
月落雞聲早，依然天一涯。

鷗

一官辭帝輦，南去客途分。
孤棹迎新漲，歸程檢舊文。
細

流螢落日疎柳拂高雲白鳥沙邊立飄飄自不羣

蟬

高柳咽新蟬初聞思惘然可堪新別處况復早秋天響
逐輕風度心隨餘韻懸故鄉行未至愁劇不成眠

旅泊

旅泊頻驚夢孤村獨繫舟雨餘新漲滿日落晚風柔為
客經年久歸程計日酬一杯聊自遣沙上有眠鷗

夜讌朱子介園池

清讌開池上輕風吹樹枝已憐秋氣好正是月明時玉
露沾衣重金尊送酒遲平生好客興為我更忘疲

中秋遇雨宿江中

本擬中秋夜家庭待月圓蹉跎靈雨裏猶自滯江邊海
氣隨潮上江聲入枕懸夢回天未曙起坐不成眠

哭李冢宰

丹旄飛飛江水濱失聲知己喪元臣誰將消骨陳張祿
終履危機禍長民才擬干將偏易折魂銷犴狴竟難伸

山丘華屋尋常理獨有羊曇淚滿巾

官舍敝漏朝來雪霰盈案賦此遣興

官衙清冷思寥寥屋破風高雪不消
三瓦未陳珠的歷四圍多隙紙飄搖
寒燈無著愁書濕布被多情怯夜迢
安得杜陵文藻筆秋風茆屋賦長謠

人日立春

佳辰愛人日况復立春時節喜三陽至
羹傳七菜宜未歌高適句且賦道衡詩
莫謂家鄉近終成兩地思

過精嚴僧舍

金尺口八
卷八
人日過禪寺言修淨業緣鳥鳴簷樹近雲護佛燈圓佳
節尋僧遣新詩洗研傳麈來還麈去不必悟真詮

借得張子昆崙詩抄

不見昆崙三十年偶從僧寺拾遺編歸來細向窓前讀
宿草芊芊淚黯然

曹娥祠

江上濤聲接大荒祠前雙檜鬱蒼蒼孤墳何必山川麗

一死能將姓字揚，妙迹已無王逸少。
題辭空問蔡中郎，真魂不逐寒煙散。
月落潮迴思渺茫。

雨中同李舍人宿靈隱寺

西湖春水拍天浮，日日春陰繫我愁。
沾濕莫辭花下過，空濛自得雨中遊。
有無轉憶王維句，潦倒先拚金谷籌。
夜靜不知雲卧冷，朝來白雪滿山頭。

宿雲堂山樓

舊日西湖路，梅花幾度開。
暫拋塵外事，乘興雨中來。
山

逕團青嶂禪房鎖綬苔一宵清淨業浩劫自輪迴

至山陰

山陰城中花欲舒山陰城南錦不如秦碑禹穴猶在望
蘭亭剡曲成丘墟春光雖已足游賞勝地無柰空躊躇
等閒世事竟陳迹千載悠悠北伐書

登載山

風慕山陰勝千峯羅翠屏探奇窺禹穴讀記想蘭亭俯
仰悲今昔煙霞本性靈空餘載山廟誰寫換鵲經

龍泉山

曉色姚江上青山逐霧開輕風吹竹樹初日照樓臺春
到花爭發潮平水自迴莫言行役苦勝境且徘徊

鏡湖

鏡湖湖水如鏡平峯巒罨畫搖空明浮雲飄飄自來往
輕舟迅邁勞相迎白鷗雙雙暎山遠青蒲曲曲隨舟生
風流賀老已千載轉憶悠悠身後名

暮春嘉禾項子長園亭讌集



九十韶華今日晴名園喜見綠陰成雲光映水黃鶯轉
草色侵衣白鷺驚刻竹又重題姓字舉杯還與說平生
山窮路轉孤花媚猶見餘春一種情

庭中一竹生意蕭然春來忽生數筍喜而賦之

亭亭一竹挺高寒正對先生首宿盤造化不私深雨露
春風還自長琅玕

五月新晴簡齋同僚

五月官衙樂事多綠陰清晝午風和茶烹雪乳新羅峴

硯洗青花舊斧柯翠竹露梢舒嫩葉文魚依藻泳清波
一枰碁了人初散小小宣鑪爇水磨

糴米

喜得儒官少簿書清閒真足憫慵疎年衰久已知安分
命薄常令意不如如有祿代耕還糴米無園種菜敢思魚
閉門日暮廚煙起默坐空思嘆索居

午門朝見時大內新成

九重宮闕倚天翔不日功成拱萬方三殿昭回還舊觀

五雲縹緲麗晴光分明周室營豐洛不數關中治未央
自媿微臣何幸會也隨鸛鷺侍班行

長安逢郭山人

漫聞東岱覓奇踪忽向長安道上逢大笑仰天無一語
只言日觀最高峰

羨爾身如不繫舟飄然五嶽恣奇遊長安市上一杯酒
此日相逢空白頭

題溪南別業

西溪溪水深不流溪南更築林堂幽會心自有濠濮想
乘興不數山陰舟一簾暮雨足吟眺萬疊春山供卧游
主人方有蒼生寄惟餘清夢狎輕鷗

黎內翰惟敬梁中翰思伯攜酒見過

未遂幽栖願聊為帝里游微官常自足高士每相求抗
志雙蓬鬢端居一敝裘無文驚海內徒自仰前修

喜徐太守子與至席上得陽字

五馬朱輪入帝鄉曾將九折嘆王陽久知惠政同吳漢

更喜文章似子長
世事何如杯酒在
風塵不見歲時忙
倚闌獨立詩成處
萬里青天鴈一行

一麾閩海出明光
曾是含香粉署郎
行見望之還少府
不妨汲黯卧淮陽
天涯媿我空奔走
歲暮逢君倍感傷
今日一杯須盡醉
相逢莫笑屈為邦

連日奔走塵冗懷抱欠佳偶
過顧舍人汝由研山
齋見其窓明几淨折松枝
梅花作供鑿玉河水烹茗
啜之又新得鳧鼎奇古目
所未見灸內府龍涎

香恍然如在世外不復知有京華塵土賦此紀興
偶入高人室恍然塵夢醒香生金鴨火茶剖玉河水簷
際鳴幽鳥窓間出凍蠅春光遽如許萬慮一時增

除夕與肇兒守歲

莫將除夕感浮生且喜明朝歲又更日月將遷拋舊曆
風塵時逐媿虛名膝前賦就椒花獻盞內香浮柏葉傾
炙手朱門何處是一燈相對候雞鳴

元旦早朝

殷殷仙樂半空聞斗轉河斜曙色分
輯瑞羣侯瞻肅穆履端萬象荷氤氲
靈煙彷彿凝三殿霽景招搖麗五雲
四十一年端拱化願歌周頌繼思文

冒雪訪吳侍御時巡警方歸寓善果寺

忽報故人至禪房暫解鞍攬衣頻促駕
衝雪不知寒直指霜威肅風塵行路難
歸來報明主春色滿長安

出德勝門見杏花

獨坐空齋感歲華春風日日捲黃沙
閉門無意窺楊柳

出郭驚心見杏花西望居庸開錦障北來天壽隱晴霞
驅馳莫問昌平道野寺含煙落日斜

送韓子游嵩嶽

名山誰最勝嵩嶽正中天石室有奇趣天池多列仙雲
霞時萬變日月晚雙縣曾讀盧鴻志因君更惘然

贈沈山人

一見出世人澹然忘物累閒談山水勝真得煙霞趣蕭
然隨去住所至興自寓嗟我濁世姿何由悟三昧

寒夜梁思伯小酌

新寒抱膝掩衡門上客開筵禮意敦
最喜晤言消永夜獨憐白髮照清樽
羣賢並集風流曠列坐歡歌笑語溫
醉後不嫌歸路晚天街塵靜已黃昏

上巳韋園送徐子與得松字

韋園三日宴黯黯惜離踪攀柳心先折
看花興亦慵臨流羨清水坐石蔭高松
不是無言贈無言意更濃

會臺郵城故墟齊魯會盟處有子建讀書臺

齊魯多奇跡，鄆城會有臺。當年空戰伐，此日已蒿萊。子建不可作，齊桓安在哉。悠然會心處，選勝草堂開。

玉河橋見白燕和顧舍人汝和

玉河橋下水生苔，玉河橋邊白燕來。梨花柳絮亂翻舞，浴鷗飛鷺空驚猜。金殿雪殘麗鵲鳴，瑤臺月冷歸蓬萊。摠道緇塵暗京洛，緇塵不染不凡材。

四月七日顧汝和明日四十誦杜詩馬上足成之
四十明朝是清樽，今日開煖風吹白晝。庭草長蒼苔，玉

殿裁書竣金鑾捧詔廻年光容易過羨爾接三台

和姚太史雪中竹

飛雪洒蒼筠分明白鳳翎風廻翻舞袖映月淡疎檣掃
去茶初熟看來酒易醒更憐人似玉清氣滿虛亭

九月十七日與肇兒夜過呂公祠浦澈縈廻菰蒲
掩映月色如畫真一片江南也適張氏兄弟攜琴
阮至酒酣鳴琴撥阮命童子奏笙簫以和之恍然
如在世外三酌而起朗詠成篇

呂公祠下水盈盈秋月無如此夜明爽氣直從銀闕冷
彩雲時向玉杯傾笙簫並奏餘音轉琴阮和鳴雅調成
晤賞未能聊自適不妨明日事還生

是夜令人速王明佐不至至橋上更酌時沈山人
寓張園咫尺閉戶却寄二君

帝京車馬日駢闐此夜清游更可憐月色水光相盪射
簫聲琴韻兩悠然王猷興盡乘舟返沈約愁多閉戶眠
勝景慚余能獨占為君還賦紫雲篇

送張月鹿浙江憲幕

獨抱奇文入帝京
風流江左舊知名
百年作賦追平子
四海何人薦長卿
但有聲華垂宇宙
豈須爵位盛簪纓
錢塘江上秋風早
閒看寒潮日夜生

送友人游五嶽

五嶽名山天下奇
擬從遐覽寄深思
幼輿丘壑真成癖
宗炳神游意已移
對月時從僧寺飲
看花何必主人期
慚余未脫樊籠累
羨爾飄飄任所之

文遠閣

小閣靜沉沉虛明生道心
端居同李泌清閤擬雲林
問字頻攜酒談玄時鼓琴
夢回應有得千載有知音

雪晴望居庸山

熹微霽色麗朝暎北望居庸雪正皚
聳處只如瞻華嶽
光迷猶似接崑崙
崑崙晶瑩奚訝銀山近擁護方知玉闕尊
三百年豐占可兆不妨高卧掩衡門

送秦叅議之任

憶昔當年借榻時蕭條風雨繫深思吳門別後心常念
帝里相逢喜可知王事有程多遠役旬宣無地不宜詩
攜樽未得時相遇况又匆匆重別離

寄嚴相公

昔宰黃扉日常懷綠野游過來泉石性翻繫廟廊憂樂
事林園勝新詩花鳥愁懸車明畫錦漢廣莫能儔

獨坐

閒齋獨坐晝遲遲花落花開總不知偶傍宮牆騎馬過

鶯聲飛出最高枝

雨過空庭白晝明
虛齋獨坐聽流鶯
春風不道官衙冷
依舊青青蔓草生

春興

帝里逢春春可憐
五雲樓閣麗中天
御溝花落流澌盡
瑤島雲飛海日懸
風度漢宮銀刻箭
香生南陌翠花鈿
無由暫醉金錢會
零落東風又一年

綺陌塵香輦路斜
東風早晚遍天涯
建章曉色千門柳

上苑鶯聲萬樹花細草生煙消積雪新波浮玉麗晴沙
五陵年少爭馳逐獨是羈人轉憶家

送華憲副南歸憲副公與其兄皆以少年知名余
與嘉弟亦以是時獲交二公自正德壬申五十年
餘猶復奔走道路而憲副公既登進士歸老林間
其仲子又舉進士余得以儒官為僚友適憲副公
自錫山至而嘉弟亦以計偕至相與秉燭夜話感
念疇昔雖升沉顯晦不同而白首愉愉邂逅于數

千里外亦奇矣哉因賦小詩識別而嘉弟作圖於
前以見一時會晤之勝

憶昔追隨卅角童于今衰老盡成翁青燈小坐傾杯細
白首相逢笑語同顧我弟兄猶骯髒羨君父子盡登崇
一時邂逅真良會莫謂飄飄雪上鴻

七月二十一日集南郊鄭尚書園亭得城字

十畝芳園倚帝城初秋選勝集羣英柳條未墜霜前葉
池水新添雨後萍濠濮會心真不遠風塵飛夢此時清

振衣更有高臺望無限江南萬里情

廿三日同黎惟敬姚元白許殿卿沈懋學歐楨伯
嘉弟集吳侍御明卿宅得竿字

新秋風日麗長安偶集高齋興未闌縱酒狂歌留勝賞
投壺散帙罄交歡久知燕市多奇骨莫向磻溪問釣竿
陳迹易遷時易改五湖煙水正漫漫

綠水園詩為陳壽卿賦

名園綠水自先賢繼繼繩繩世永延臺榭由來從簡樸

篇章喜得尚流傳
平泉有誓成陳迹
獨樂無求得自全
試問辟疆何處所
寒煙衰草已茫然

嘉弟久不見至

出門聞說是新春
寄得書來又未真
消息參差無可問
夢魂顛倒有時親
老年兄弟情偏重
薄命功名晚未伸
忽爾秋風將又至
時時翹首路河津

林駙馬園亭賞紅蓮

主家留客敞華筵
一朵紅蓮倚檻鮮
太液分來知不遠

莊宮開處自天然，秋風入座生陰細。
曉日窺簾拂露圓，醉後不聞香滿坐。
銀箏翠管沸遙天。

宿通州靖嘉寺

古寺荒煙合，巍然三殿存。
迴廊餘磴石，曲逕滿苔痕。
歲久果愚暗，庭閒鳥雀喧。
獨憐車馬客，一宿戀空門。

平谷公署古槐

僻縣人稀早，閑關庭槐合。
抱挺蒼顏秋，深已覺寒蟬盡。
日落徐看倦鳥還，久歷歲華宜老大。
不藏丘壑亦蕭閒。

有懷欲就東陽賦文藻誰如康子山

平谷道中

捧檄趨平谷西風送馬蹄秋深衰柳變日落晚山低荒
草原原合黃雲入望迷邊城烽火息野老自提攜

又

雞聲催曉發露重木棉裘白塔遠先見青山濕未收小
橋看過雨野渡有橫舟處處顏垣在令人生隱憂

遊興善寺

峨眉山外即長城，斥堠無驚秋氣清。
黃葉擁山飛殿角，青煙出樹隱鐘聲。
偃松茂葉雙蛟舞，流水瓊瓏萬玉鳴。
莫道遐荒多寂寞，五雲咫尺是神京。

歲暮承歐楨伯梁柱臣過有詩見贈因各次韻

京華臘月動風沙，獨掩衡門坐日斜。
驚見高賢朝枉駕，因知短炬夜先花。
旋沽燕市過牆酒，閒數昭陽帶影鴉。
自是玄亭甘寂寞，一輪春色在誰家。

羣英並轡訪清幽，首肯堆盤一笑留。
南望宮牆飛殿宇，

北來黷舍似林丘
劇談世事空無據
閒看浮雲靜不流
陶謝詩篇公等在
慚余潦倒獲同游

至日不出有懷王申二太史

虛齋獨坐靜焚香
綵線初添日影長
世事驚心催物候
家山入夢惜流光
風迴畫漏傳蓬闕
雲麗晴空繞建章
遙憶故人天祿閣
閒吟襪頌殿東廊

簡黎惟敬直閣兼懷梁柱臣中翰

抱病經旬獨卧家
故人咫尺似天涯
愁添鬢改霜生鏡

歲暮心驚雪作花
白日看雲飛桂海
青藜然火直金華
清宵只隔宮城月
悵望西南五色霞

不出

漫說為官好
常憂室罄懸
近承秦御史
贈我寫碑錢
飯飽哀年肉
薪生冷竈煙
從來慵應接
且復枕書眠

再過寶塔寺

禁城西畔舊禪房
松檜陰陰日轉廊
隔院靜聞棋子落
垂簾深護菊花香
祗緣帝里紅塵擾
始覺空門白日長

兩度經過留不得買山猶自媿支郎

黑山遣祭

帝遣微臣禮國殤荒原哀草黑山陽朝廷大事惟戎祀
邊塞游魂懾虎狼當日捐軀真勇烈百年報德有輝光
慚余蹇拙才情減無復奇文弔戰場

初轉成均學錄呈同寮諸公

偶轉官階向辟雍橫經分講日愉容彝章品節羣英聚
禮樂陶鎔六館同久傍宮牆沾聖化喜看桃李盛春風

董韓千載聲華重俯仰前修憶二公

人日集顧氏桃花館同集者黎惟敬休承弟顧汝
和諸昆季也

喜逢人日轉青陽燕賞桃花舊草堂七菜漫隨時令設
一杯聊與故人嘗東風早已回明庶柳色行將繞建章
但得弟兄常聚首不妨京國是他鄉

送休承弟之任吉水

東風吹水柳青青送爾遙從吉水行薄祿驅馳南北路

老年離別弟兄情歸鴻已逐春先去
駑馬猶餘櫪下鳴
別後相思何處是五雲應接鳳凰城

頌厯

龍樓候曉報雞人玉殿千官氣象新
改歲自慚虛過日
授時喜得又逢春
燾微曙色開黃道
彷彿鑪煙散紫宸
頌朔從來傳盛事
覃恩何幸及微臣

送姚元白考績還金陵

去年送爾出燕京
隔歲相逢更有情
白鷺洲前秋欲老

黃金臺下草還生往來不異隨陽鴈身世何如逐浪萍
苦憶舊游行樂處因君時夢石頭城

送吳侍御出守太平

一麾出守向江南黯黯離情望去驂念我獨居空有淚
知君顧影本無慚英風久已聞當宁奏疏從來滿石函
今日循良二千石臺端才力更誰堪

至夜書懷

靜掩衡門晝不開陽生冬至又飛灰雪深太液冰初合

柳傍宮牆煖未回
弱線自添愁處影
孤燈難盡醉中杯
不禁千里還家夢
長樂鐘聲故故催

玉河春色

春半京華盛綺羅
冰消太液長新波
燕巢香壘依金殿
柳拂流澌出玉河
細草生煙晴日麗
煖雲吹雨落花多
風光流轉須臾事
且向尊前一浩歌

清明大雪因憶十年前亦是日下雪蓋北方常事
而南人則未之見也

清明大雪亂紛披十載曾逢合更奇
點綴杏花紅艷色密封楊柳壓新枝
寒侵繡幄冰重見月冷瑤臺露下遲
說與南人應不信區區莫怪夏蟲疑

袁魯仲改官南部詩以送之

子向留京非避世余慚北闕尚貪名
兩行新柳誰為折千里歸人已有程
心逐去旌隨夢遠酒傾離恨共愁生
還家正是春三月一路看花到石城

贈范職方

文正公孫也

范相風流百代殊諸孫奕奕振三吳承家節操真無忝
復始公侯定不虛自有聲名垂宇宙何妨憂樂異江湖
只今義澤雖猶在願爾重增萬斛租

寄顧克承何有齋

陋室人皆棄惟君興不窮石蒲圓滴露水竹細含風建
蓋乳花白沙鑪煎甲紅未能分半席時夢到城東

次韻答寄黃淳父

寄我瑤華如見面何時風月得平分案陳紫璞依金鼎

障列青山鎖白雲
永日和風閒闌茗
孤燈夜雨細論文
窓明几淨心如洗
此樂應知獨有君

讀白雪樓詩却寄李于鱗

余與徐子與王元美見所謂五子詩者既而游京師
見宗子相雖不久亦蒙知愛蘭汀已矣惟不得見于
鱗偶讀白雪樓集悵然有懷賦此寄之

何處仙人白雪樓
山東李白最風流
煙霞此日成高舉
丘壑于今屬卧游
麗藻時傳驚海內
聲華久矣遍遐陬

江湖潦倒空相憶何日相逢解我愁

薛子熙以修史至青州登東山入京將歸四明

繞到青州又帝京東山奇觀鳳凰城山川壯麗開胸臆
文采風流熟令名喜得持杯論故舊不妨倒屣下公卿
羨君歸興應難阻又送知章返四明

閒齋即事

帝里豪家競賞春香車寶馬鬪鮮新幽居閒看雲來往
草色鶯聲故惱人

清陰寂寂草菲菲此日方知春已歸
總是無花有蜂蝶
翻翻來往繞庭飛

清虛山

即兔園

青霞片片玉玲瓏
員嶠方壺指顧中
喜見平林游白鹿
靜看激水噴蒼龍
香生別殿玄都近
雲護高臺碧落通
春盡飛花猶滿地
分明身在蕊珠宮

寇至

朔兵十萬穴秦城
擁騎長驅薄漢京
備禦可能無上策

去來何事少先聲
中原將帥空推轂
此日書生願請纓
弓矢不勞干羽在
廟堂應有蒼蒼生

徐子與席上分韻

大火欲西流
朝來已立秋
老年何易改
去客苦難留
別酒翻添恨
新詩不解愁
音書如可達
咫尺是皇州

得秋字

溽暑無由避
芳筵此日開
故人來舊雨
天際殷輕雷
傲世空雙鬢
浮生且一杯
浩歌聊自適
隨處可徘徊

得雷字

槐陰圍北牖六月自生寒老愛逢迎嬾狂貪禮數寬不因前日別那得此回歡俛仰成陳迹從知行路難

得歡字

驟雨祛煩暑新涼接素秋清尊閒北海佳客得南州知己真難遇玄言未易酬不須論去住且復此淹留

得州字

韋園秋集贈劉君

帝京塵土滿征裘此日城南得勝游昨夜微霜初墜葉
芳原爽氣肅清秋輕風吹酒開涼宇落葉催寒出御溝
直擬韋園作韋曲况逢禹錫最風流

黎惟敬小集得霜字

衡陽轉參畢玉露將為霜涼風起天末肅肅吹衣裳欣
此良宴會蹲舞羅酒漿感時懷隱憂仰睇雪飛揚

又

辭條葉初委柰何草木黃飄飄隨所之萬里天風翔翩

翩送飛鴻唧唧啼寒蛩玄言不可悉遠心希皇唐

送友人

送爾飄然返四明孤雲野鶴一身輕不須更乞千秋觀
自和滄浪唱濯纓

送沈君叅政河南

當年夕拜瑣闥郎此日承恩出建章數奏久知承密勿
撫旬今復見循良風塵去去辭燕薊旌節翩翩指洛陽
行見望之還少府徵書早晚下明光

恭遇聖駕幸太學

聖主臨雍慶禮成
千年文物覩昇平
五雲馭日來三殿
百辟承恩下九城
象輦乍回清蹕迴
鸞旌前導翠華明
小臣何幸躬逢盛
豈謂儒冠誤此生

聽講

璧水羣英集
盛時橋門觀
聽萬人隨乞言
已覩臨雍禮
啟沃先尊坐
講儀際會明
良真喜起周旋
品節自逶迤
天顏悅豫親
瞻望莫道惟容
近侍知

蒙恩賜襲衣

朝罷鑾輿下玉墀
臨門駢錫自天垂
唱名頒給依金水
叩首親承出鳳池
未媿桓榮稽古力
獨憐顏駟遇時遲
歸來雲錦生茅屋
默坐時歌湛露詩

仲中翰處賦蓬萊閣上仙得長字

木天清切久徊翔
麗藻承恩侍建章
常自含香歸第晚
每因退食綺筵張
春風拂檻花枝繞
燕子窺簾柳浪長
要識仙凡原不隔
瀛洲不遠帝城傍

春雨書懷

十日春陰不裹巾
喜看庭際綠苔新
山齋聽雨惟高卧
忘却門前問字人

考滿書事

考績趨隨鵷鷺班
天官引奏陞中間
三年虛起趨朝謁
此日方親識聖顏
咫尺天威真穆穆
威儀禮數自閒閒
傳宣復職綸音下
縹緲徐看扇影還

有感

年來踪蹟任西東萬事都歸一笑中
薊北紅塵虛日月江南白晝又春風
悠悠莫問湟中鹿落落空懷塞上翁
安得高情同叔夜時將雙目送飛鴻

王敬美入京補選過金陵言別同袁魯仲高座寺
餞之

仗劍辭家及暮春相逢白下柳條新
擬從北闕霑新命先向南都別故人
細雨暫停僧寺酒煖風輕拂馬頭塵
古來名士多年少看爾飛騰切禁宸

南雍齋宿夜坐呈諸公

永夜沉沉刻漏長
碧天如洗露華涼
風生竹樹人聲靜
月擁樓臺露靄香
方澤已崇新典禮
致齋猶習舊彝章
南都莫謂無禋祀
一體君臣肅禘嘗

浴芳亭

永夜池塘暑氣清
綠陰圍合午風輕
新篁弄影知魚樂
疎柳飛花聽鳥鳴
日轉空庭茶正熟
涼生虛枕夢初成
致齋三日全無事
夜夜清言坐月明

雨花臺

岩崑雙闕隱蓬萊更有長江天際來無限江山無限好
就中尤愛雨花臺

桃花

春晴緩轡太平堤萬樹桃花映水齊不是六朝行樂處
直須認作武陵溪

乞休致喜

青衫白髮賦歸歟六館橫經九載餘承乏獨慚縻廩祿

引年三上乞休書聖恩浩蕩容投老茂苑荒蕪有敝廬
待得春風開凍後扁舟南下樂何如

文氏五家集卷八